

D^a ROSA ANA PRADA QUEIPO, SECRETARIA DO CONCELLO DE AMES NA PROVINCIA DA CORUÑA

CERTIFICO: QUE O PLENO DESTE CONCELLO LEVOU A CABO SESIÓN ORDINARIA O 28 DE XUÑO DE 2012, DESA REUNIÓN REDACTOUSE A CORRESPONDENTE ACTA QUE É DO TEOR LITERAL SEGUINTE.

ACTA DA SESIÓN ORDINARIA LEVADA A CABO POLO PLENO DO CONCELLO O DÍA 28 DE XUÑO DE 2012.-

No Salón de Sesións da Casa do Concello de Ames, ás vinte horas (20:00) do día 28 de xuño de 2012, reúnese o Pleno do Concello en sesión ordinaria de primeira convocatoria, baixo a presidencia do Sr. alcalde don **Santiago V. Amor Barreiro** e coa asistencia dos/as señores/as concelleiros/as seguintes:

Grupo municipal Popular	Grupo municipal Socialista	Grupo municipal do BNG
M ^a Dolores Fernández Álvarez	Patricia Conde Lois	Olalla Alvite del Río
Manuel Ferreiro Santiago	José Francisco Doval Galán	María Pilar Candocia Pita
Ramón García Argibay	Isabel González Cancela	Xosé Anxo Doval Rey
María González Gómez	José Manuel Miñones Conde	Susana Mallo Redondo
M ^a Eugenia Martín Vicente	José Pazos Balsa	
Emilio Martínez Carballeira		
Bernardo Moar Míguez		
Alfonso Rey López		
Alfredo Taboada Alvelo		
M ^a Carmen Verde Leboráns		

Asiste o señor **interventor** don José Antonio Rueda de Valenzuela.

Actúa como **secretaria** a titular da Corporación dona Rosa-Ana Prada Queipo.

Non asiste pero xustifica a súa ausencia a concelleira do grupo municipal socialista dona **Carmen Fraga Crespo**.

A) PARA DAR CONTA:

Punto Primeiro.- Dar conta ao Pleno da Corporación dos decretos ditados pola Alcaldía dende a última sesión plenaria ordinaria.

O señor alcalde don **Santiago V. Amor Barreiro** informa á Corporación que os decretos ditados pola Alcaldía dende a última sesión plenaria ordinaria estiveron a disposición de todas/os as/os concelleiras/os na Secretaría Xeral, engadindo que o acceso aos decretos é libre para todas/os as/os concelleiras/os en calquera momento na Secretaría Xeral do Concello, e que con ocasión da convocatoria dos plenos ordinarios o que teñen a súa disposición é o libro oficial, en papel timbrado e numerado, ademais dos duplicados existentes nos distintos departamentos do Concello.

Punto Segundo.- Dar conta ao Pleno da Corporación da situación dos concelleiros dona María Pilar Candocia Pita, dona Olalla Alvite del Río, dona Susana Mayo Redondo e don Xosé Anxo Doval Rey tras a súa baixa do Bloque Nacionalista Galego (BNG).

O señor alcalde don **Santiago V. Amor Barreiro** da conta deste asunto, informando que na documentación que conforma este expediente figura o escrito de renuncia asinado polos 4 concelleiras/os antes pertencentes ao Bloque Nacionalista Galego (BNG), no que comunican a súa baixa política nesta agrupación, e un informe de secretaría xeral que detalla a normativa aplicable e a situación na que quedan estes ediiis a partires da toma en coñecemento da renuncia, pasando a ser concelleiras/os non adscritas/os, e pasando o BNG a quedar sen representación no concello de Ames. Os efectos políticos e económicos da condición de non adscritos despregarán os seus efectos ao día seguinte da toma de coñecemento polo pleno de dita condición.

Intervén a concelleira dona **Pilar Candocia Pita** para solicitar que conste en acta o seguinte: Os catro concelleiras/os presentamos o escrito da baixa o día 6 de marzo, o comunicamos de inmediato. Queremos facer constar tamén que nós seguiremos traballando polo programa polo que nos presentamos.

B) PARA DELIBERACIÓN E ACORDO:

Punto Terceiro.- Aprobación se procede da acta anterior.

O señor alcalde don **Santiago V. Amor Barreiro** somete a consideración da corporación a acta correspondente á sesión ordinaria do 31 de maio de 2012 preguntando se hai algunha alegación que facer ao respecto.

Intervén o voceiro do grupo municipal socialista don **José Manuel Miñones Conde** para dicir que téndose producido o levantamento da sesión do 31 de maio, na acta non se reflicten os feitos tal e como foron. Naquel momento estaba intervindo un concelleiro, se dixo que se remataban as intervencións e non se facía un segundo turno, logo que non era necesario ese segundo turno, despois houbo unha corrección, e que si se podía facer ese segundo turno, e se lle deu a palabra ao concelleiro que estaba intervindo. Todo ese proceso falta por reflectir na parte final da acta.

Intervén o señor alcalde don **Santiago V. Amor Barreiro** para dicir que está recollido na acta que como non se dan as condicións para o desenvolvemento normal do pleno e continuar cunha segunda quenda se levanta a sesión, están recollidos os motivos polos que esta se levantou.

Sometida a votación, a acta de 31 de maio de 2012 resulta aprobada cos votos favorables dos membros do grupo municipal popular e a abstención do resto dos membros da corporación municipal.

Intervén a concelleira dona **Pilar Candocia Pita** para solicitar que conste en acta o seguinte: Como explicación de voto na aprobación desta acta temos que dicir que nos abtemos porque consideramos que non queda suficientemente clara a finalización do pleno, esa é a razón.

Intervén o señor alcalde don **Santiago V. Amor Barreiro** para dicir: Está gravado, nesta lexislatura os partidos teñen acceso ás gravacións dos plenos, e se transcribe tal e como figura na gravación.

Punto Cuarto.- Inicio expediente para a elección do xuíz/a de paz substituto/a do Concello de Ames.

O señor alcalde don **Santiago V. Amor Barreiro** explica substancialmente o asunto dicindo que tendo quedado vacante a praza de xuíz/a de paz substituto/a compe iniciar os trámites para a a súa cobertura.

Rematadas as intervencións o pleno da corporación, por unanimidade dos seus membros presentes, adoptou os seguintes acordos :

Primeiro.- Iniciar expediente para elección do xuíz/a de paz substituto/a do Concello de Ames

Segundo.- Prestar aprobación ás bases que a continuación se transcriben, acordando a súa exposición pública:

1. Obxecto da convocatoria: Elección de xuíz/a de paz substituto/a do Concello de Ames.

2. Prazo de presentación de solicitudes: Quince días hábiles contados a partir da publicación do anuncio no Boletín Oficial da Provincia. Tamén se publicará nos xornais El Correo Gallego e La Voz de Galicia, no taboleiro de anuncios e na páxina web.

3. Requisitos dos/as solicitantes:

a) Ser español/a.

b) Ter dezoito anos de idade.

c) Non ter acadada a idade de xubilación na carreira xudicial.

d) Declaración xurada de non estar incapacitado/a para o exercicio da carreira xudicial.

e) Declaración xurada de non estar incurso/a en causa de incompatibilidade e no suposto de estar incurso/a, coa excepción de actividades profesionais e mercantís, compromiso de optar polo posto de xuíz/a de paz substituto/a do Concello de Ames.

4. Documentación: As solicitudes dirixiranse ao alcalde presidente do Concello e estarán acompañadas da seguinte documentación, que terá carácter de orixinal ou copia compulsada:

- DNI.

- Partida de nacemento.

- Certificado do Rexistro Central de penados e rebeldes.

- Declaracións xuradas ás que se fai referencia no punto anterior.

- Relación e documentación acreditativa dos méritos alegados.

Terceiro.- Facultar ao alcalde don Santiago V. Amor Barreiro para cantas actuacións de trámites sexan precisas para a mellor execución do acordado.

Punto Quinto.- Aprobación inicial da modificación da ordenanza reguladora do prezo público pola prestación do servizo das escolas infantís municipais do Concello de Ames.

O señor alcalde don **Santiago V. Amor Barreiro** cede a palabra ao concelleiro delegado de Comercio, Promoción económica, Traballo, Turismo e Educación don **Bernardo Moar Míguez**, que introduce substancialmente o asunto dicindo que dende a concellaría se propón esta modificación xa que tal e como se desprende dos balances as escolas infantís teñen un importante déficit. Se modificaron os prezos das escolas infantís de titularidade autonómica, e a derradeira modificación da ordenanza agora vixente é do ano 2009.

Rematadas as intervencións o pleno da corporación por maioría absoluta, cos votos a favor dos 11 membros do grupo municipal popular e o voto en contra dos 5 membros presentes do grupo municipal socialista e do resto dos membros da corporación municipal, adoptou os seguintes acordos:

Primeiro.- Prestar aprobación inicial á modificación da ordenanza reguladora do prezo público pola prestación do servizo das escolas infantís municipais do Concello de Ames cuxo texto figura como anexo I deste acordo.

Segundo.- Someter dito acordo de aprobación inicial a exposición pública por prazo de 30 días hábiles mediante anuncio no BOP, páxina Web municipal e taboleiros de anuncios, a efectos de exame e reclamacións,

Para o suposto de non presentarse reclamacións, o acordo de aprobación inicial quedará elevado a definitivo de xeito automático.

Terceiro.- Facultar ao señor alcalde presidente don Santiago V. Amor Barreiro para cantas actuacións de trámite sexan precisas para a mellor execución do acordado.

ANEXO I

ORDENANZA REGULADORA DO PREZO PÚBLICO POLA PRESTACIÓN DO SERVIZO DAS ESCOLAS INFANTÍS MUNICIPAIS DO CONCELLO DE AMES

Artigo 1.- Obxecto.

En uso das facultades concedidas polos artigos 133 e 142 da Constitución Española e artigo 106 da Lei 7/85 reguladoras das bases do Réxime Local e artigos 41 a 44 do Real Decreto Lexislativo 2/2004, de 5 de marzo, polo que se aproba o Texto refundido da Lei reguladora das facendas locais, o Concello de Ames aproba o prezo polo servizo das Escolas Infantís (0-3) dependentes do Concello de Ames, que se rexerá pola presente ordenanza, así como pola citada normativa, e demais que resulte de aplicación.

Artigo 2.- Suxeitos obrigados.

Están obrigados ao pagamento das cantidades que se establecen como prezo as/os nais/pais dos nenos e das nenas en situación de alta nos centros sinalados no artigo anterior, no seu defecto, os/as familiares ou titores/as legais a quen corresponda o exercicio da patria potestade.

Artigo 3.- Pagamento.

O pagamento das cotas, sen prexuízo do establecido no artigo 5 desta Ordenanza, realizarase mensualmente nos dez primeiros días naturais do mes a que correspondan. Nos casos en que o ingreso no centro se produza con posterioridade ao día primeiro do mes, a cota correspondente ao dito mes ingresarase nos dez días naturais seguintes á data de ingreso.

- a) No caso de utilizar o servizo de comedor por días soltos, realizarase o pagamento deste servizo xunto coa cota do mes seguinte.
- b) Salvo o disposto no artigo 5 desta Ordenanza, a falta de asistencia da nena ou do neno ao centro non supón redución nin exención da cota mentres non se formalice a baixa correspondente.
- c) A falta de pagamento de dúas mensualidades consecutivas ou tres alternas, sen prexuízo da súa esixencia polo procedemento administrativo de constrinximento, orixinará a perda do dereito á praza.

Artigo 4. Regras e definicións para a determinación do importe que se vai pagar.

Para a determinación do importe mensual que van pagar as persoas obrigadas ao pagamento dos prezos públicos determinados no anexo desta Ordenanza, teranse en conta as especificacións recollidas no dito anexo. Para os efectos da aplicación do anexo, a renda per cápita mensual da unidade familiar computarase segundo as seguintes regras:

- a) Entenderase por unidade familiar a formada polos cónxuxes non separados legalmente e:

i. Os/as fillos/as menores, con excepción dos que, con consentimento dos/as pais/nais, vivan independentes destes/as.

ii. Os/as fillos/as maiores de idade incapacitados xudicialmente suxeitos á patria potestade prorrogada ou rehabilitada.

iii. Os/as fillos/as maiores de dezoito anos discapacitados cun grao de discapacidade superior ao 33 por cento.

A determinación dos membros da unidade familiar realizarase atendendo á situación existente no 31 de decembro do ano a que se refiran os datos económicos a que se refiren as seguintes regras.

b) Tomarase o importe dos ingresos totais da unidade familiar, que será o resultado da agregación das rendas do exercicio anterior a aquel en que dea comezo o curso escolar, no cal se pretenda que produza efectos, de cada un dos membros da unidade familiar, calculadas por agregación da base imponible xeral coa base imponible do aforro, calculadas segundo os criterios establecidos na normativa do imposto sobre a renda das persoas físicas.

O importe dos ingresos totais da unidade familiar será acreditado, mediante a presentación das copias certificadas pola Administración tributaria das declaracións do IRPF ou a certificación de ingresos das persoas que non presentasen as declaracións do IRPF.

A documentación anterior poderá ser substituída pola correspondente autorización á Administración con competencia en materia de escolas infantís 0-3 para obter os datos necesarios para determinar os ingresos totais para estes efectos a través da correspondente administración tributaria.

c) O importe anterior dividirase polo número de membros computables da unidade familiar. No caso de familias monoparentais, incrementarase nun 0,8 o número real de membros que compoñen a unidade familiar. Entenderase por familia monoparental a unidade familiar a que se refire a letra a) cando formase parte dela un único proxenitor ou proxenitora que non conviva con outra persoa con que manteña unha relación análoga á conxugal e sempre que o outro proxenitor ou proxenitora non contribúa economicamente ao seu sustento.

d) A renda per cápita mensual será o resultado de dividir o importe anterior por doce.

Artigo 5. Suspensión temporal da cota.

1. Os suxeitos obrigados a que fai referencia o artigo 2 non terán a obriga de aboar a cota correspondente á atención educativa e ao servizo de comedor durante os seguintes períodos:

a) O mes de vacacións anual da/o nena/o.

b) Cando por calquera motivo distinto ao período de vacacións anuais o centro permaneza pechado por un período superior a quince días naturais.

En ambos os dous casos a suspensión realizarase de oficio.

2. Os suxeitos obrigados a que fai referencia o artigo 2 non terán a obriga de aboar a cota correspondente ao servizo de comedor no seguinte suposto:

a) Cando por causa debidamente xustificada a/o nena/o deixe de asistir

temporalmente ao centro. Neste caso, a suspensión da cota terá lugar desde o primeiro día do mes natural seguinte á data de inasistencia ao centro e durará ata o día primeiro do mes natural en que teña lugar a reincorporación da/o nena/o ao centro.

Non obstante, se a reincorporación se produce con posterioridade ao día 15 do mes, a cota do comedor correspondente ao dito mes reducirase nun 50 por cento.

A solicitude de suspensión da cota correspondente a este servizo, xunto coa acreditación documental da circunstancia que a motiva, deberá presentarse ante o Concello, que resolverá sobre a procedencia da exención.

Nos casos de suspensión temporal da cota correspondente ao servizo de comedor, o pagamento correspondente ao mes de reincorporación realizarase no prazo dos dez días naturais seguintes á data de reincorporación. Así mesmo, nos casos en que o órgano competente do Concello acorde a non procedencia da suspensión solicitada, o suxeito obrigado deberá ingresar as cotas atrasadas no prazo dos dez días naturais seguintes á notificación da resolución denegatoria.

Disposición derradeira primeira.

Autorízase á Alcaldía para ditar as normas que sexan necesarias para o desenvolvemento e a aplicación desta Ordenanza.

Disposición derogatoria única.

Quedan derogadas cantas disposicións de igual ou inferior rango se opoñan ao disposto nesta Ordenanza e, en particular, o disposto na

Disposición final.

A presente ordenanza reguladora entrará en vigor unha vez que publicada no Boletín Oficial da Provincia, nos termos indicados no artigo 65.2 da Lei 7/85, do 2 de abril, Reguladora das Bases do Réxime Local, e manterase en vigor mentres non se acorde a súa derogación ou modificación expresa.

ANEXO 1.- Tarifas.

1. Prezo da atención educativa.- O prezo pola atención educativa en xornada completa nas escolas infantís 0-3 dependentes do Concello de Ames fíxase en 160 € mensuais.

Segundo a renda per cápita mensual da unidade familiar, sobre este prezo aplicaranse as seguintes reducións:

- a) Rendas inferiores ao trinta por cento do IPREM. Prezo da praza: con servizo de comedor 0€; sen servizo de comedor 0€.
- b) Rendas comprendidas entre o 30 e inferiores ao 50 por cento do IPREM. Prezo da praza: con servizo de comedor 16,50€; sen servizo de comedor 0€.
- c) Rendas comprendidas entre o 50 e inferiores ao 75 por cento do IPREM. Prezo da praza: con servizo de comedor 49,50€; sen servizo de comedor 33€.
- d) Rendas comprendidas entre o 75 e inferiores ao 100 por cento do IPREM. Prezo da praza: con servizo de comedor 91€; sen servizo de comedor 66€.
- e) Rendas comprendidas entre o 100 e inferiores ao 125 por cento do IPREM. Prezo da praza: con servizo de comedor 141€; sen servizo de comedor 106€.
- f) Rendas comprendidas entre o 125 e inferiores ao 150 por cento do IPREM. Prezo da praza: con servizo de comedor 176€; sen servizo de comedor 126€.

- g) Rendas comprendidas entre o 150 e inferiores ao 200 por cento do IPREM. Prezo da praza: con servizo de comedor 199€; sen servizo de comedor 139€.
- h) Rendas superiores ao 200 por cento do IPREM. Prezo da praza: con servizo de comedor 230€; sen servizo de comedor 160€.

2. Prezo dos servizos complementarios:

- Servizo de comedor: fíxase un importe de 70 euros mensuais. Para o caso dos/as nenos/as que non empreguen habitualmente o servizo e que desexen utilizalo algún día con carácter suelto aboarán a contía de 4 euros por día. O prezo de comedor por días soltos non estará suxeito a ningunha redución.
- Horario ampliado: o prezo mensual de cada hora solta en que se incrementa o horario normal será de 20 euros. O prezo da hora extraordinaria non estará suxeito a ningunha redución.
- Servizo de merenda: fíxase en 1 euro por día.

3. Descontos:

A) Segundo as circunstancias da unidade familiar, sobre o prezo que resulte de aplicar o disposto no punto anterior, aplicaranse os seguintes descontos que non son acumulables entre si:

- a) Nenos/as pertencentes a familias numerosas, desconto dun 20 por cento.
- b) Nenos/as pertencentes a familias monoparentais, desconto dun 20 por cento.
- c) Cando asistan ao mesmo centro varios irmáns, o segundo e sucesivos terán un desconto dun 20 por cento.

Entenderase por familia numerosa aquela que reúna as condicións que determina a Lei 40/2003, do 18 de novembro, de protección ás familias numerosas.

Para a aplicación dos descontos teranse en conta as circunstancias concorrentes no momento de presentación da solicitude de praza na escola infantil 0-3, que deberán ser previamente xustificadas documentalmente de non coincidir coas circunstancias na data da devindicación da declaración do IRPF.

B) Cando por circunstancias sobrevidas (solicitude fóra de prazo, traslado de residencia, etc.), o/a neno/a ingrese no centro con posterioridade ao día 15 do mes, a cota que corresponda pagar polo dito mes terá un desconto do 50 por cento.

Contías máximas aplicables a centros de atención á primeira infancia.-

RENTA PER CAPITA MENSUAL	COSTE MENSU AL	FAMILIA NUMERO SA	FAMILIA MONOPAREN TAL	ALGÚN IRMÁN	MEDIA XORNAD A
Inferior ao 30% do IPREM	exento	exento	exento	exento	exento
Entre o 30% do IPREM e inferiores ao 50% do IPREM	exento	exento	exento	exento	exento
Entre o 50% do IPREM e inferiores ao 75% do IPREM	33,00	26,40	26,40	26,40	16,50

Entre o 75% do IPREM e inferiores ao 100% do IPREM	66,00	52,80	52,80	52,80	33,00
Entre o 100% do IPREM e inferiores ao 125% do IPREM	106	84,80	84,80	84,80	53,00
Entre o 125% do IPREM e inferiores ao 150% do IPREM	126,00	100,80	100,80	100,80	63,00
Entre o 150% do IPREM e o 200% do IPREM	139,00	111,20	111,20	111,20	69,50
Superiores ao 200% so IPREM	160,00	128,00	128,00	128,00	80,00

ANEXO 2.- Baremo de aplicación ás solicitudes de admisión nas Escolas Infantís Municipais do Concello de Ames.

1º.- Situación socio- familiar.

- 1.1.- Por cada membro da unidade familiar: 2 ptos.
- 1.2.- Por cada persoa que, non formando parte da unidade familiar, estea a cargo desta: 1 ptos.
- 1.3.- No caso de que a/o neno/a para o que se solicita praza nacesse nun parto múltiple: 1 ptos.
- 1.4.- Por cada membro da unidade familiar, afectado por minusvalidez física, psíquica ou sensorial, enfermidade que requira internamento periódico, alcoholismo ou drogodependencia: 2 ptos.
- 1.5.- Pola condición de familia monoparental: 3 ptos.
- 1.6.- Pola ausencia do fogar familiar de ambosos dous membros parenterais: 6 ptos.
- 1.7.- Por irmán/á-áns/ás con praza renovada no centro: 3 ptos.
- 1.8.- Pola condición de familia numerosa: 3 ptos.
- 1.9.- Calquera circunstancia familiar grave debidamente acreditada: 3 ptos.

2º.- Situación laboral e familiar

2.1.- Situación laboral de ocupación:

-Pai: 4 ptos.

-Nai: 4 ptos.

2.2.- Situación laboral de desemprego:

-Pai: 2 ptos.

-Nai: 2 ptos.

*No caso de familias monoparentais, adxudicaráselles a puntuación do epígrafe correspondente multiplicada por dous.

3º.- Situación económica

RPC mensual da unidade familiar, referida ao indicador público de renda de efectos múltiples (IPREM) vixente:

- Inferior ao 25% do IPREM: +4 ptos.
- Entre 25% e o 50% do IPREM: + 3 ptos.

- Entre 50% e o 75% do IPREM: + 2 ptos.
- Entre 75% e o 100% do IPREM: + 1 ptos.
- Entre 100% e o 125% do IPREM: - 1 ptos.
- Entre 125% e o 150% do IPREM: - 2 ptos.
- Entre 150% e o 200% do IPREM: - 3 ptos.
- Igual ou superior ao 200% do IPREM: -4 ptos.

En caso de obter igual puntuación, daráselle prioridade á renda per cápita máis baixa.

Punto Sexto.- Aprobación definitiva do Plan Especial APR B3-02, Camiño do Rueiro II do PXOM de Ames.

O señor alcalde don **Santiago V. Amor Barreiro** cede a palabra ao concelleiro delegado de Persoal, Reforma Administrativa, Servizos e Urbanismo don **Ramón García Argibay**, que explica substancialmente o asunto dicindo que este expediente se iniciou no ano 2008, o 12 de novembro dese ano se determinou a non necesidade de sometelo a avaliación ambiental estratéxica, o goberno actual decidiu darlle vía libre, producíndose o 6 de outubro de 2011 en Xunta de Goberno Local a aprobación inicial. Durante a exposición pública da aprobación inicial o expediente foi remitido a Patrimonio porque no lugar hai un hórreo antigo, e este organismo contestou que hai que trasladalo e que hai que remitir no seu día o proxecto de urbanización.

Rematadas as intervencións o pleno da corporación, por unanimidade dos seus membros presentes, adoptou os seguintes acordos :

Primeiro.- Aprobar definitivamente o Plan Especial APR B3-02 Camiño do Rueiro II, integrado polo texto refundido de data de visado de decembro de 2011. O texto refundido está redactado pola arquitectura dona Pilar Vence Lodeiro e o anexo polo enxeñeiro don José Luis Pérez Donsión.

Segundo.- Publicar a aprobación definitiva no Diario Oficial de Galicia, aos efectos do establecido no artigo 92.1 da Lei 9/2002, de 30 de decembro, de Ordenación Urbanística e Protección do Medio Rural de Galicia. Esta publicación deberá realizarse no prazo dun mes desde a adopción da aprobación definitiva.

Igualmente, publicarase a aprobación definitiva xunto coa normativa e as ordenanzas do Plan Especial no Boletín Oficial da Provincia da Coruña todo iso en virtude do establecido no artigo 92.2 da Lei 9/2002, de 30 de decembro, de Ordenación Urbanística e Protección do Medio Rural de Galicia.

Terceiro.- Comunicar o acordo de aprobación definitiva, en virtude do artigo 92.3 da Lei 9/2002, de 30 de decembro, de Ordenación Urbanística e Protección do Medio Rural de Galicia, aos efectos oportunos, á Consellería competente en materia de Urbanismo e Ordenación do Territorio, achegando unha copia autenticada de dous exemplares do Plan aprobado definitivamente con todos os planos e documentos que integran o plan sobre os que recaese acordo de aprobación definitiva, debidamente dilixenciados polo secretario/a do concello.

Cuarto.- Facultar ao alcalde don Santiago V. Amor Barreiro para cantas actuacións de trámites sexan precisas para a mellor execución do acordado.

C) PARA CONTROL DO GOBERNO:

Punto Sétimo.- Moción sobre a taxa por actividades e servizos relacionados

coa hixiene urbana.

Toma a palabra o señor alcalde don **Santiago V. Amor Barreiro** para dicir que como quedou pendente da sesión anterior unha segunda quenda de intervencións, se retoma o asunto no punto onde quedara, concedendo a palabra o señor Doval Rey.

Intervén o concelleiro don **Xosé Anxo Doval Rey** para dicir: Antes de que fora levandada a sesión anterior dunha maneira pouco razoable, ao meu modo de ver, porque se podía continuar sen ningún problema, estabamos escoitando o informe do interventor, da secretaria e do tesoureiro, respecto da proposta de caducidade do expediente. Non entendemos a razón pola que se pedía ese informe. Na moción que nós presentabamos en ningún momento falabamos de caducidade, e si do arquivo do expediente. Creo que iso é o que ten que facer o señor alcalde, debe resolver, se é que quere, sen levar adiante as conclusións que se derivan dese informe.

Durante estes días houbo distintas intervencións que saíron na prensa sobre a reunión que houbo entre o señor alcalde e a Plataforma do lixo e sobre que non se presentara ningún tipo de documento ao que se comprometeran. Eu non sei se se comprometeron ou non porque non estiveron nesa reunión, pero en todo caso quen ten que presentar documentos é o goberno, que para iso ten os medios, e non a Plataforma, e podería dicir que nin sequera a oposición. A cuestión é se quere ou non o goberno resolver e archivar este expediente dunha forma favorable ao que solicita a maioría dos veciños. Penso que debería facelo, e vou redundar nalgún dos motivos xa ditos na anterior sesión con algún argumento mais, porque creo que debería repensalo.

Se ben é certo que o artigo 15 da ordenanza onde se regula a taxa establece que nace a obriga de contribuír dende o momento en que se inicia a prestación do servizo, esta obriga só pode ser satisfeita despois de ser realizado o censo, cuestión que no ano 2009, 2010 e 2011 non estaba. Por tratarse dunha taxa por servizo público, esta se establece en razón do número de contribuíntes e do custo do servizo, e iso só pode ser así porque a Lei Tributaria prohíbe establecer contías nas taxas que deran lugar a maiores ingresos que o custo do servizo, o que acontecería se vostedes seguisen adiante con este despropósito. O custe do servizo no ano 2010 era de 840.000 € aproximadamente, en función diso se estableceu unha taxa de 70 € e pico, e se agora vostedes nos cobran -porque eu tamén son afectado- case 300.000 €, recadarían mais do que custaría o servizo, co cal nos poderíamos atopar con que dentro duns meses non só nós, senón todos os veciños das urbes, virían reclamando ao concello oito ou dez euros porque están cobrando mais do que custaría o servizo.

Vou ler o que di exactamente a Lei de Facendas Locais: “el importe de las tasas por la prestación de un servicio o por la realización de una actividad no podrá exceder en su conjunto del coste real o previsible del servicio por la actividad de que se trate”. Por tanto xa quedou claro que non poden recadar mais, aínda que sexa dous ou tres anos despois, porque están cometendo unha ilegalidade. Como di por aí algún cartel, ademais de inxusta, a medida que están adoptando é ilegal. É unha opinión baseada, por suposto, en informes xurídicos, pero quen ten que recadar eses informes, se queren, son vostedes. Os informes existen, se non o fan están manifestando claramente que non teñen outra intención, como xa dixeran o outro día, que cubrir parte dese déficit cunhas cargas a todos os veciños manifestamente, na nosa opinión, ilegais e excesivos.

Intervén o voceiro do grupo municipal socialista don **José Manuel Miñones Conde** para dicir: Coincidindo novamente co que di o señor Doval Rey, a nós nos gustaría centrar esta segunda quenda mais no que continuamente se está a establecer como argumentario do grupo de goberno, que non é outro que botar a culpa á anterior corporación socialista. Creemos que é importante non entrar no debate de quen ten a culpa, senón en atopar solucións, e precisamente en atopar solucións a iniciativa é

novamente dos veciños. Na búsqueda de solucións o goberno está de brazos cruzados e son os veciños os que teñen, non lles queda outra, que buscar solucións, a pesares de non ter os medios económicos, materiais nin persoais, cos que si conta o concello. Cremos que existe falta de vontade política de facelo, tan só polas declaracións que escoitamos por parte do alcalde despois da última reunión que se tivo coa Plataforma.

Recorrendo novamente aos informes dos que tanto se fala, a nós nos gustaría deixar ben claros os antecedentes deste proceso, porque se nos bota a culpa, por exemplo, de iniciar o expediente. A min gustaríame recoller deste último informe que se nos presentou no pleno anterior, sen ter acceso ao mesmo, por unha providencia de Alcaldía duns días antes, no que no punto 4º di *O procedemento de comprobación limitada iníciase coa notificación da proposta de liquidación*, e ese inicio de expediente do que se fala e esa proposta de liquidación é a que se fai no decreto 560 por parte da Alcaldía, é dicir, do señor Amor, de data 14 de marzo, no que se di “Primeiro.- Realizar a proposta de regularización da taxa pola prestación dos servizos e actividades relacionados coa hixiene urbana” aí é onde se inicia, e xustamente unha semana despois, o 21 de marzo, coa notificación mediante esa primeira famosa carta, de notificación do trámite de audiencia á proposta de regularización. Nós tamén recurrimos aos informes dos técnicos que din cando se inicia este expediente. Loxicamente todo isto foi empezado polo anterior goberno, pero queremos deixar ben claro cando se inicia este expediente, porque ate que se empezaron a recibir as cartas non se iniciou.

Se nos pode acusar de poñer en marcha o de regularizar a xestión do padrón, porque loxicamente nós puxemos en marcha a regularización deste padrón mediante un traballo de campo ¿por que? porque nós tamén recurrimos aos informes dos técnicos, e alá por agosto do 2007 vou ler textualmente o que recollía o informe do interventor: *nunha reunión que ten lugar no despacho da Alcaldía, á que asisten o alcalde (o anterior alcalde), Amador Mosquera, o xefe de servizo, e este informante, nela tratouse o tema do prezo que ven cobrando a empresa por xestionar o padrón de lixo. Este prezo é do 7% da recadación, merced a un acordo verbal (repito “a un acordo verbal”) alcanzado co anterior alcalde, o señor Astray*. Visto este informe se nos solicita por parte de intervención que se regularice esta situación do cobro deste 7% acordado verbalmente. Nós o fixemos, e o fixemos segundo os técnicos como se tiña que facer ¿como se tiña que facer? mediante un procedemento, neste caso público, e mediante ese famoso contrato que vostedes tanto sacan á luz e que vou pasar a ler para deixar ben claro que é o que fai, un contrato, cuxo obxecto é *servizos complementarios de contrato de xestión de servizo público abastecemento e saneamento consistentes na realización das tarefas definidas no prego de prescricións ¿por que no prego de prescricións? porque nós levamos ese contrato non de forma verbal senón mediante un procedemento negociado, público, no que se pedía o seguinte: obxecto de contrato: a prestación dos servizos de colaboración e asistencia técnica, material e informática no exercicio das funcións da xestión do padrón fiscal correspondente á taxa regulada, ordenanza fiscal número 7, da taxa por actividades e servizos relacionados coa hixiene urbana*.

Este é o contrato tan famoso, para a prestación de servizos de colaboración e asistencia técnica. Nas cláusulas dese contrato se di: *traballos necesarios para a formación, o mantemento, a conservación e a depuración do padrón fiscal*. Non se fala en ningún punto do cobro retroactivo. *Traballos de alta, baixa, modificación e*

depuración de erros no padrón fiscal. Non se fala en ningún punto de cobro retroactivo. Elaborar informes respecto aos valores de defectuosa emisión, incorporación de referencias catastrais dos inmobles na confección do padrón, formación dos expedientes con propostas de baixa, facilitar en tempo e forma o correspondente padrón fiscal, adaptación do padrón fiscal, colaborar cos servizos xurídicos municipais na elaboración de propostas de resolución e cantos traballos de campo sexan ordenados dende o concello para comprobar novos feitos impoñibles. Este contrato, que vostedes din que foi asinado o día anterior, é o contrato famoso no que non se fai nin unha soa referencia ao cobro con carácter retroactivo dos anos 2009, 2010 e 2011 ¿por que se teñen que cobrar estes anos? Porque vostede, señor alcalde, nun decreto, notificou, mediante esas cartas das que falaba antes, o cobro deses anos anteriores. Se vostede houbese notificado o cobro do 2012 non estaríamos neste problema. Por último dicir que nestes informes técnicos se nos di, e nese que asinaron o interventor, a tesoureira e a secretaria, se nos di continuamente o que dicía o señor Doval, consecuencias xurídicas para a caducidade do procedemento, para a caducidade, pero existen outras alternativas, outras vías que non sexa a caducidade, como se di neste informe: *por resolución expresa*, é dicir, o procedemento remata a través dun dos seguintes xeitos: por resolución expresa, por caducidade ou por inicio dun procedemento inspector. Poden vostedes perfectamente recurrir, sempre que teñan vontade, a outras alternativas, como así lles están presentando a través da Plataforma do lixo.

Intervén o concelleiro delegado de Persoal, Reforma Administrativa, Servizos e Urbanismo don **Ramón García Argibay** para dicir: Sen ánimo de polemizar mais sobre este asunto porque xa está todo moi falado, vostedes veñen aquí cunha misión clara e o veñen demostrando moito tempo: tentar despistar, e lles rogaría por favor que conforme nós estivemos respetuosamente escoitando aos demais concelleiros da oposición, me deixaran a min, esta vez, acabar de facer a miña intervención. Por favor, só pido iso. Vostedes son demagogos compulsivos, e quen fala do partido socialista aínda é moito peor. Vostede mente descaradamente e o fai ademais a propósito, porque eu a vostede o teño por unha persoa preparada, e por tanto ao estar preparado ademais é mal intencionado, e iso é o que me molesta, me molesta que lle minta á xente, cando ese contrato que leu vostede sabe que está avalado por unha lexislación tributaria. Iso o sabe vostede e non o di, e nós o dicimos, e cando vostedes antes falaban de transparencia, mais transparencia que esta non hai, cando vostedes din que non tiveron acceso ao informe -ese que vostede acaba de ler dese xeito que le vostede- o tiveron colgado na páxina Web ao día seguinte, non me diga vostede que non porque estaba colgado, e se lles facilitou antes do tempo regulamentario establecido pola lexislación, antes. Eu só lle pido que non minta, mire, hai moitas formas de facer política, moitísimas, e uns nos equivocaremos mais e outros menos, pero o que non facemos é mentir, nós de repente non tolemos, e somos conscientes da repercusión política que isto está traendo e o agravio que nos pode causar, pero a misión responsable dun goberno é facer algo que ademais provocaron vostedes, mire por onde estou defendendo a súa posición, vostedes están provocando que o goberno do PP neste concello estea defendendo unha medida do PsdeG, creo que vai pasar aos anais da historia da política, pero é que o temos que facer, porque despois de escoitar as barbaridades que se din aquí de que a palabra déficit non ten importancia, cando a palabra déficit de 500 ou 600 mil euros nunha escola infantil a pon en perigo, cando escoitamos esas barbaridades, de vostedes non podemos esperar outra cousa, colaboración cero, xa o sei, pero temos que seguir adiante porque é a nosa misión e para iso nos votou a xente, para tomar medidas, algunhas serán populares e outra non tanto, e lle podo asegurar que vostede volve mentir cando fala de inicio de expediente, volve mentir, porque a obrigación se inicia o día antes polo señor Carlos Fernández, antigo alcalde deste concello, o día anterior a marcharse para a súa casa, aí é onde comeza, esa é a

realidade.

Dos non adscritos non espero nada, porque no seu momento non estaban onde estaban vostedes e entendo que non teñen moito que dicir, agora, dunha persoa que ademais foi concelleiro gobernando este concello, que ademais vostede estaba ao carón do alcalde Fernández Castro, e que veña dicir iso, isto é cando menos incrible, que teña vostede a desfachatez de vir a este pleno e publicamente estar detrás dunha pancarta, por un procedemento que nós estamos obrigados por imperativo legal a iniciar por unha medida súa o día anterior a deixar o goberno, iso non o vou cualificar, porque cando menos non é ético.

Xa sei que aos que vivimos no rural non nos gusta esta medida, loxicamente, cómo nos vai gustar, pero é que vostedes menten outra vez cando din que esta é unha cuestión inaudita, que nunca se fixo, menten, pero ademais de mentir, insisto, eu a vostede o teño por unha persoa preparada, porque alguén que se foi documentar, e vostede se pode documentar, sabería perfectamente que en Galicia hai unha chea de concellos que tomaron medidas de xeito similar ao que estamos facendo nós, cun matiz nalgún deles: que fixeron as cousas ben dende o principio, cousa que vostedes fixeron pola porta de atrás, e esa porta se pechou ao día seguinte de gañar as eleccións e vostedes fixeron o que fixeron. Esa é a grandísima diferenza. Eu podo consentirlle a vostede moitas cousas, pero non lle podo consentir baixo ningún concepto que diga que este goberno iniciou o expediente do lixo, porque está demostrado e está por escrito que foi por imperativo legal; por certo, é a única proposta por escrito, a única de momento. Está por escrito por habilitados nacionais, non elixidos polo goberno do PP nin por ningún outro grupo político, grazas a unha oposición son habilitados nacionais e están neste concello, e as súas decisións, como as de todos nós, teñen o máximo respecto ¿que non nos gustan? vale, pero lles temos o máximo respecto, e hai que cumprilas. Vostede debería de saber, e sei que o sabe, que a lexislación hai que cumprila, outra cousa é que lle guste estar detrás dunha pancarta e lle guste enganar aos veciños e manipular algunhas manifestacións, iso é o que lle gusta a vostede, pero esa non é forma de facer política, porque ao final, díxenllo moitas veces ao anterior alcalde, o tempo pon a cada un no seu sitio, e ao final se saberá quen di a verdade e quen mente, manipula e ademais actúa de forma malintencionada.

Nós, como vostede sabe, fomos por todas as parroquias e nos consta que a algunhas persoas non lles gustaba esta medida, e cando lla explicabamos persoalmente, e seguiremos facéndoo, un por un e casa por casa se fai falta, acababan entendendo. O obxectivo deste goberno era moi claro, o que pasa é que non se nos permitiu no seu momento, e non se nos permitiu porque vostedes fixeron o que fixeron. Insisto, o obxectivo deste goberno era animar ás persoas a que fixeran as alegacións para dar un argumento a este goberno, como di o señor Doval, para resolver, porque este goberno o que quere é resolver, outra cousa é que teñamos argumentos legais para resolver nun sentido ou noutro, pero se a xente non fai as alegacións individualmente, como dixemos por activa e por pasiva, este goberno non pode resolver moitos dos casos nun sentido ou noutro.

O sentido común, que é o menos utilizado, di que se nós tiveramos a capacidade legal de non tramitar o expediente no seu momento ¿vostede cre que non o faríamos? ¿vostede cre que nós non buscaríamos unha alternativa?. Cando estivemos reunidos coa Plataforma do lixo, unha das propostas que lles fixemos, e que estivemos trasladando aos veciños, foi que estabamos dispostos a modificar a ordenanza para

que nun futuro baixara o prezo do lixo e así poder minorar esa cantidade de cartos, e tentar, entre comiñas, compensar esa desfeita que vostedes iniciaron. Esa proposta a fixemos publicamente, e consiste en dicir se antes se pagaba 70€ de taxa, ao mellor pasamos a pagar 60,55... habería que estudar a cantidade, polo tanto, esa medida a propuxo este goberno, e xa o fixo nas reunións coas parroquias, non o día da Plataforma como se dicía, que tamén, medida que está enriba da mesa, e aínda estamos esperando ver se a aceptan ou non, como unha das opcións posibles. Minorar, baixar o prezo da recollida do lixo no rural, non vaia ser que despois vaian vostedes dicindo por aí que tamén o estamos ofrecendo en Milladoiro e Bertamirás, porque non, no rural soamente, estou falando moi clariño, tentar rebaixar o prezo para que nuns anos se mitigue ese efecto.

De momento é a única opción legal. Nós lanzamos no seu momento unha mensaxe moi clara: se hai persoa física, xurídica, asociación, plataforma, chámelle como vostede queira, vostede como concelleiro, vostedes como grupo municipal que teñen unha asignación económica e que poden encargar informes, como os encargamos nós cando estabamos na oposición, que para iso son os cartos, vostedes, que teñen eses cartos, vaian onde teñen que ir, e se conseguen un documento firmado, legalmente avalado, tráigano e o estudamos. Esa proposta a fixemos dende o primeiro día en que nos reunimos cos veciños, e van un mes ou dous, e ate o día de hoxe ninguén, nin persoa física nin xurídica, nin plataforma, nin asociación, nin grupo municipal socialista, que ten unha asignación mensual e pode permitirse gastarse eses cartos nun informe xurídico, nin ninguén, nin os non adscritos tampouco, ninguén presentou nin un so papel, soamente unha tarxeta e un panfleto, isto é o que temos de documentación. A ver quen está facendo política seria e responsable e a ver quen está facendo política demagóxica e malintencionada.

Toma a palabra o señor alcalde don **Santiago V. Amor Barreiro** para dicir, dirixíndose ao público: Por favor, silencio. Seguimos coa celebración do pleno, o estou pedindo con educación, aquí non se obriga a ninguén, están voluntariamente vostedes neste pleno e estamos debatendo con liberdade de expresión.

Continúa o señor alcalde, dirixíndose ao voceiro do grupo municipal socialista: Señor Miñones, este goberno non está de brazos cruzados, porque de estar de brazos cruzados houbera xa iniciado a segunda fase do expediente. Do grupo dos non adscritos, dona Pilar Candocia lle transmitiu aos técnicos deste concello concellos onde podían estar pasando cosas parecidas a esta. A proposta que eu saiba fíxona o señor alcalde, non estamos de brazos cruzados, se está preguntando a concellos, a mais de doce concellos por esta situación que estamos a ter en Ames, incluso a consorcios de concellos, e se non pregunten aos alcaldes socialistas presentes no Consorcio das Mariñas a ver como se iniciou o procedemento. O que non vou permitir é que vostede estea aquí xogando coas datas, difamando e utilizando a demagogia, señor Miñones. Vostede está dicindo que o expediente o iniciei eu a través dunha providencia, pero non di quen o inicia, e despois se contradí e di que eu inicio o expediente e por outro lado di que se iniciou con anterioridade nunha reunión que houbo en Alcaldía onde se chegou ao acordo de palabra de confeccionar o padrón, e aí está o inicio. En ningún momento fala, señor Miñones, dunha carta que manda o anterior goberno, o anterior alcalde, no mes de maio do ano 2011, onde se fala xa dos recibos que estaban pasando con recargo pola taxa da recollida do lixo, diso non di nada. Esa carta non a firmo eu ¿verdade? vostede sabe quen a firma, e temos aí os comprobantes masivos de recepción de moitos veciños de Ames desta carta.

Eu creo que hai que ser serios, señor Miñones, e dicir quen inicia este expediente, agora vostede quere emendarlle a plana ao anterior alcalde, que me parece ben, para algo o levou na súa lista hai catro anos e o volveu levar nestas últimas eleccións, pero vostedes non fixeron ningunha proposta, se lles enche a boca dicindo cousas pero non fan propostas, e nós seguimos buscando solucións. O que pedimos ás

asociacións é que se eles teñen algunha solución que a aporten, nós xa a estamos buscando. Xa se contactou tamén con outro organismo para que en próximas datas poda emitir o seu informe. Nós seguimos traballando neste asunto, e haberá que dicir aos veciños quenes son os responsables. Nós agora temos que apandar co que nos deixaron vostedes, con este expediente, coas débedas e co déficit nos comedores e nas garderías. Xa digo, vostede utiliza a demagogia para o que lle convén e utiliza as datas tamén para acusarme a min de iniciar este expediente cando saben perfectamente quen o iniciou. Se as eleccións municipais non foran como foron, xa se tería falado hai tempo neste pleno deste tema, e vostedes o continuarían, unha vez iniciado no ano 2011.

Sometida a votación, a moción sobre a taxa por actividades e servizos relacionados coa hixiene urbana é rexeitada por maioría absoluta cos votos en contra da moción dos once membros do grupo municipal popular e os votos a favor do resto dos membros presentes da corporación municipal (nove).

A moción rexeitada é do seguinte teor literal:

Moción sobre a taxa por actividades e servizos relacionados coa hixiene urbana

EXPOSICIÓN DE MOTIVOS

O Concello de Ames está remitindo unha carta a todos os inmobles da zona rural baixo o epígrafe: Notificación de trámite de audiencia e proposta de regulación, co obxecto: Taxa por actividades e servizos relacionados coa hixiene urbana, e nesta carta sinálase unha “omisión do padrón municipal da taxa” referida ao seu inmovle. Sobre esta base fáiselle unha “proposta de liquidación e regularización da súa situación tributaria” para os anos 2009, 2010 e 2011, que supera os 200 € para unha vivenda acadando cifras moito maiores no caso de inmobles con actividades económicas.

En relación con isto un número moi importante de veciños afectados xa rexistraron un escrito presentando as seguintes alegacións:

- 1. Non se achega, como sería preceptivo, o correspondente estudo económico financeiro como un instrumento básico para fixar a contía da débeda tributaria (STS 6.3.1999), onde se determina a relación entre o custe do servizo e a contía da taxa; o que causa unha grave indefensión sendo motivo de nulidade absoluta, en aplicación do artigo 62.1, e) da Lei 30/1992.*
- 2. A proposta de regularización tramítase indebidamente a través dun procedemento de comprobación limitada, cando o axeitado legalmente sería un procedemento de inspección. O concello debería proceder a un labor de investigación como cando se inicia a obriga do pagamento da taxa requirida pola non inclusión nun padrón municipal, que non é atribuíble ao interesado, senón ao concello. Polo que se debería proceder a decretar a nulidade das actuacións iniciadas.*
- 3. O Concello de Ames actuou de xeito incorrecto ao non regularizar os padróns como a súa ordenanza xeral regula. Tamén se cometen infraccións doutros preceptos relativos da súa propia normativa e do deber de dilixencia e boa administración, xa que tería que ter facilitado os modelos normalizados de ingreso da taxa, así como a emisión do recibo. Ningún deses dous trámites foron cumprimentados nos períodos obxecto de regularización, e nunca se emitíu ningunha notificación aos interesados en relación ao cobro do lixo. Non pode agora o Concello pretender, nun procedemento*

inadecuado, facer unha emisión retroactiva para eludir as súas propias deficiencias de xestión.

O feito de que as oficinas xestoras do Concello responsables da taxa de hixiene non cumpriren coa obriga de elaboración do padrón, nin cos estándares dunha xestión eficaz, fixo que boa parte da veciñanza rural de Ames non fose consciente das obrigas tributarias en que incorrían respecto deste tributo. Un principio xeral do dereito aplicable neste caso afirma que “quen sabe e consente non recibe inxuria nin engano”.

4. O funcionamento anormal do concello, por non emitir os recibos a tempo, deriva agora nun requirimento por recibos atrasados, co que está pretensión do concello vulnera o principio de protección á confianza lexítima, que preside a relación entre a administración municipal e os administrados, como concreción do imperativo de seguridade xurídica, recollido expresamente no artigo 3 da Lei 30/1992.

5. Dada a deficiente xestión municipal en relación con esta taxa, que ten como consecuencia a vulneración do dereito que ten todo obrigado tributario, neste caso arredor de 4000 veciños e veciñas do rural, a ser informado e asistido pola administración sobre o exercicio dos dereitos e obrigas relativas ao pagamento da taxa, tal e como se recolle no artigo 34.1 da Lei Xeral Tributaria, debe procederse a ditar resolución pola que se proceda ao arquivo das actuacións iniciadas sen a emisión das liquidacións que figuran na proposta de regularización.

Queremos advertir que a práctica totalidade dos veciños do rural considera apropiado o pago dos impostos que lles corresponden pola recollida do lixo, nunha contía axustada ao servizo que reciben. Pero a pretensión do Concello de cobrar tres anualidades pasadas sen ter coñecemento previo vai contra os principios da boa administración e a confianza lexítima; non se pode facer cargo aos administrados duns atrasos que non son responsabilidade súa.

Por estes motivos o Pleno do Concello de Ames adopta os seguintes acordos:

- 1. Proceder ao arquivo dos expedientes abertos e que non se proceda á liquidación da taxa por actividades e servizos relacionados coa hixiene urbana correspondente aos anos 2009, 2010 e 2011.*
- 2. Rematar no presente ano a elaboración e depuración do padrón da Taxa por actividades e servizos relacionados coa hixiene urbana, e que a partir da aprobación definitiva deste padrón comece se inicie a liquidación das obrigas tributarias de aí en diante segundo a Ordenanza aprobada en novembro de 2011, aplicándolle as opcións de pago recollidas na mesma.*
- 3. No presente ano se constituía unha comisión entre os partidos políticos e as asociacións veciñais que elabore unha nova ordenanza que teña en conta as diferentes características do servizo que se presta en zonas urbanas, urbanizacións e zonas rurais.*
- 4. Os orzamentos correspondentes ao ano 2012 que se aproben terán en conta os axustes necesarios para compensar as desviacións que se producen polos menores ingresos que se van producir sobre o recollido no Plan de Axuste enviado ao Ministerio de Economía.*

Punto Oitavo.- Rogos e Preguntas.

Rogos.

Intervén a concelleira dona **Pilar Candocia Pita** para formular os seguintes rogos:

Primeiro rogo.- Rogo ao señor alcalde que colla as rendas deste concello, que eu saiba o señor Carlos Fernández non está gobernando. Rógolle que nos centremos

nos problemas que temos e nas solucións que lles temos que dar. Pídlle encarecidamente que non se utilicen aquí cuestións persoais como se a xente está ou non preparada porque me parece moi incorrecto, vostede dirixe o pleno e pode facer unha alusión a que se centre o debate. Ademais a cidadanía o dixo claro e o vai volver dicir. Creo que non son correctos estes texemanexes, falemos de cara á política de se isto se pode facer así ou non e de cales son as solucións, pido que se centre, por favor, sabe que lle teño aprecio persoal, sei que está pasando un mal momento, e non pasa nada porque haxa un erro e volva atrás, esa expresión de *baixar os pantalóns*, tan machista, e todo iso de *a calzón quitado*, e outras expresións dese tipo que hai por aí, son unha verdadeira estupidez. Os veciños van valorar que vostede saiba coller as rendas, que mande no concello, que se saiba que Santiago Amor é o alcalde porque é a quen llo deron os veciños, non é que a min me guste, pero é a quen llo deron. Prégolle que mire as cousas con óptica de resolver, porque eu podo vir aquí con orelleiras, como fun moitas veces a moitos sitios, e fago autocrítica, con orelleiras, cunha decisión xa tomada, e estar escoitando o que me fan, pero eu xa sei o que vou dicir xa me digan misa, ou podo vir aquí a escoitar a ver se do que me din hai algo aproveitable e que podo coller, e iso é o que lle pido, que por favor o faga. Señor alcalde, por favor, será bo para a cidadanía amiense e tamén para vostede e para o seu goberno, nono olvide.

Segundo rogo.- Dirixido tamén ao señor alcalde, creo que foi no pleno de abril que plantexei unha necesidade dun colectivo de traballadores de Ames que está pasando, como moitos, as durezas da crise, os taxistas, que querían poder poñer nos taxis publicidade. É algo que non custa moito tempo regulamentar, isto xa o pedín no mes de abril ou marzo, é algo que se pode facer rapidamente. Por favor, que se faga xa. Outra cousa é o taxímetro e toda a normativa, que é moi engorrosa, pero o outro é rápido e supón unha vía de ingresos necesaria para esta xente. Prégolle que interveña, que o fagan rápido, senón nós estamos dispostos a presentar unha proposta, non coa intención de que sexa nosa, senón de que vaia adiante como proposta base para traballar; que se faga unha comisión na que participaremos sen ningún problema.

Toma a palabra o señor alcalde don **Santiago V. Amor Barreiro** para contestar: Despois do seu rogo no mes de abril eu falei co representante do colectivo de taxistas, incluso no momento no que foi aprobada polo Consello da Xunta, e posteriormente iniciada, a tramitación parlamentaria da Lei do taxi de Galicia, llo trasladei. Aí veñen recollidos todos eses aspectos, agora mesmo está en tramitación parlamentaria; me comprometí e lle remitín un escrito para que puidera facer mención nunha asemblea que ían ter, a que, unha vez aprobada a Lei do taxi, nós aprobaríamos a regulamentación municipal. Non están desatendidos os taxistas, a nova lei que se está a tramitar no Parlamento de Galicia afondará nesa ordenanza que imos sacar no concello de Ames.

Continúa a señora **Candocia**: Xa sei que é así, pero lles corre moita presa o da publicidade, iso é o que me trasladan a min varios deles. En todo caso o outro é independente, e se pode facer agora unha regulamentación de como pode ser o da publicidade, e despois a ordenanza, que como dixeron pode ser mais engorrosa porque está pendente da aprobación na Xunta de Galicia. Córrelles presa porque teñen ofertas de comerciantes locais que queren anunciarse, xa este verán, así que se pode mirar iso de xeito individualizado, mellor.

Intervén a concelleira dona **Susana Mallo Redondo** para formular os seguintes rogos:

Terceiro rogo.- Un rogo que ten que ver coa situación na que está a piscina municipal do Milladoiro. O verán pasado a piscina xa era responsabilidade do actual concelleiro, e deixouna caer no olvido, quizais, como dicía o señor alcalde, o goberno non estaba de brazos cruzados, estaba traballando a todo tren para subir as taxas das actividades deportivas e facendo un estropicio absoluto co reparto dos espazos deportivos, mentres facían iso non podían dedicarse a mirar a porquería, que creo que non é esaxerar, na que se converteu a piscina do Milladoiro. Falo de problemas de seguridade que están nos partes do persoal que alí traballaba e falo da zona verde, que pasou a ser unha enchenta de cañotos, terra e formigueiros, que por abandono o ano pasado agora continúa na mesma situación. O rogo é que tome xa dunha vez parte neste problema e o solucione, para que os veciños do Milladoiro podan disfrutar desa zona verde que tanto pagan este ano e que tanto lles doe pagar, por certo.

Cuarto rogo.- O pasado martes vivimos unha situación bastante delicada na porta da piscina, estábamos presentes o concelleiro e mais eu. Era un día de moita calor, un dos poucos días que este verán nos da para poder aproveitar a piscina, e de pronto houbo moita mais xente da que se prevía e cabía. A solución momentánea que se deu, e coa que eu concordei, porque me pareceu absolutamente excepcional, foi deixar pasar ás persoas alí concentradas e bastante indignadas, parte delas porque dicían eu paguei un abono e a min ninguén me dixo que non valía de nada se non había aforo suficiente, ou eu pago e son de Ames e ven calquera de Santiago, non por ser de Santiago senón por non ser xente deste municipio, a utilizar unhas instalacións que xa son escasas para os veciños. Nese momento falamos do que se podería facer para solvertar, polo menos este ano, a situación. Que me corrixa o señor concelleiro se me equivoco, pero falamos de dúas cuestións: a primeira, que as persoas que comprasen tickets soltos terían que acreditar ser veciños de Ames, é dicir, entrase como se entrase na piscina habería que ser veciño de Ames porque non hai cabida para outra cousa; en segundo lugar, se se volvía a producir unha ocupación tan alta se deixarían de vender tickets e terían prioridade as persoas que tiveran carnet e manifestaran a este concello a vontade de usar a instalación todo o verán.

Eu volví ao día seguinte e cando preguntei como ía todo me dixeron que a orde da concellaría era que pasara todo o mundo. O meu rogo é que se non se estableceron as medidas que acordamos na porta da piscina, que se establezan, por favor.

Toma a palabra o señor alcalde don **Santiago V. Amor Barreiro** para dicir: Perdoe, señora Mallo, porque eu tamén quero dicir unha cousa, vostede me chamou a min ese día en que se produciu ese problema, eu falei co concelleiro de deportes e se solucionou puntualmente, problema que tamén se deu o 22 de xullo do ano 2010, e a partires de aí eu a volví chamar a vostede para dar todas as explicacións que considereí, en función da situación. A partir de aí hai que buscar solucións, e ao día seguinte estivemos alí.

Continúa a señora **Mallo**: Seino, pero o que me sorprendeu foi chegar á piscina e preguntar que tal hoxe e que me dixeran a partir de agora non hai ningún problema porque nos di o concelleiro que pase todo o mundo.

Continúa o señor **alcalde**: Iso non é así. Foi unha situación excepcional provocada pola calor. A demanda da xente de usar a piscina é alta, e se sobresaatura a instalación, que é a que é; a partir de aí xa dimos instrucións para abordar economicamente unha posible ampliación da piscina do Milladoiro. E niso é no que estamos a traballar, podemos abordar solucións provisionais e buscar unha alternativa para o futuro.

De cara ao futuro, para o ano que ven, se non temos a ampliación, que será o mais previsible, das persoas que ese día se atopaban na piscina, creo que sobre 300, preguntei ás persoas que estaban ao cargo, porque obviamente non as contei, dixéronme que ese día venderan arredor de 100 tickets, é dicir, que unha cantidade

moi importante da xente era da que non se pode contar que vaia acceder á piscina. Nós propoñemos que se estableza para as próximas tempadas, xa que agora non se fixo e non se pode cambiar a norma, unha cota, un máximo de tickets con respecto ao aforo, de forma que garantamos sempre unha ocupación previsible: que a maioría do aforo estea garantido para aquelas persoas que se molestan en aboarse e en pagar ese aboamento, e darlle seguridade de funcionamento á instalación. Do contrario volverá a pasar todos os anos. Hai que matizar que os 100 tickets se venderon durante todo o día.

Quinto rogo.- Referente aos campamentos de verán. Nós, cando se presentaron os campamentos, fixemos constar a nosa queixa; tamén neste caso a política das subas que paga o contribuínte é para nós abusiva. Houbo casos nos que se subiu o 50% a matrícula dun campamento, ou o 27%, e a mais baixa foi dun 12%. Dixemos que quizais non parecería un tema tan importante como cando falamos de escolas ou comedores, pero probablemente ésta podería ser a única forma en que moitos rapaces tivesen vacacións este ano, porque non están as cousas en moitas familias de Ames como para saír de vacacións, viaxe ou coller unha casa na praia, e como os fillos se poñen por diante, un prezo razoable aínda que a actividade non fose en Tarragona, estou falando de Port Aventura, a xente tería polo menos ese punto de lecer e descanso que ate nos peores momentos creo que todo o mundo se merece.

Pois agora xa temos o resultado que nós esperabamos, por mais que o lamentemos. Cos datos que esta concellaría ofreceu e con algún outro que non ofreceu pero que era ben sabido, sabemos que houbo que suspender dous campamentos por non ter quórum, un o de Tarragona e outro o de Allariz de 4º de primaria. Para poder atender a estes nenos houbo que xuntalos aos de 3º de primaria, e van facer un único campamento.

Intervén a concelleira delegada de Medioambiente, Sanidade e Cultura dona **Mª Eugenia Martín Vicente** para dicir: Pero iso xa estaba previsto cando se sacaron as prazas.

Continúa a señora **Mallo**: En todo caso na convocatoria tiñamos para 3º de primaria 50 prazas do 1 ao 4 de agosto e para 4º de primaria 50 prazas do 6 ao 9 de agosto.

Continúa a señora **Martín Vicente**: En esta ratio de edad siempre había habido niños que se habían quedado fuera porque no había plazas suficientes, y entonces optamos por ofertar un número de plazas que nos garantizara, entre comillas, que pudieran ir todos aquellos niños que quisieran ir, con la previsión de que a lo mejor no se cubrían, o a lo mejor tenían que ir igualmente en dos grupos, llendo menos niños, o había que unir los dos grupos en uno; pero la intención desde un principio, de hecho este año se ofrecieron más plazas, era que ningún niño que quisiera ir se quedara fuera por no tener plaza. No se suspendió. Si algún padre hubiera querido ir en esas fechas se hubiera ido.

Continúa a señora **Mallo**: Vostede coincide comigo en que se ofertou un campamento do 6 ao 9 de agosto que non vai haber. Vostede cando se puxo en contacto cos pais, por exemplo comigo, ben claro nos dixo que non había nenos suficientes e que se non nos importaría ir cos nenos de 3ª.

Continúa a señora **Martín Vicente**: Fue idoneizar los medios, no suspensión.

Continúa a señora **Mallo**: Hai dúas convocatorias que non van ter lugar, e ademais diso, con respecto aos campamentos do 2011 baixou un 19,4% o número de

matriculados, é dicir, vai todo o que quere, pero baixou. É mais, con respecto ás prazas que vostedes ofrecían se van cubrir o 54,6% das prazas. Eu dígolle unha cousa, podería agora cebarme en todas as subas que vostedes nos están aplicando e machacando por todas partes, pero estou segura de que aínda cos prezos do anterior goberno este ano tamén baixaría a matrícula, porque as cousas están moi mal e non queren enterarse. Nos están machacando sempre aos mesmos e non podemos mais, porque necesitaríamos non só que non se fixeran subas, senón que se baixaran os campamentos. O meu rogo é que en vista dos datos, por favor, na próxima convocatoria se prime a accesibilidade, que sexa fácil, asequible economicamente e que se considere un éxito non sacar unha convocatoria con grandes campamentos, senón conseguir que a xente poda ir a eles.

Intervén o concelleiro don **Anxo Doval Rey** para formular o seguinte rogo:

Sexto rogo.- Rogo que me aclare, dada a intervención do señor García Argibay, se de presentar un informe xurídico que avale non seguir coa retroactividade no tema do lixo se comprometen a resolver pechando o expediente. Eu estou disposto a financiar un informe pero se teño o compromiso.

Intervén o concelleiro delegado de Persoal, Reforma Administrativa, Servizos e Urbanismo don **Ramón García Argibay** para dicir: Nós dixemos que se había algún informe avalado xuridicamente que nos permitira outra opción, este goberno o ía estudar e cumprir.

Toma a palabra o señor alcalde don **Santiago V. Amor Barreiro** para dicir: Señor Doval, eu creo que partirá da base de que nós non lle damos validez a un informe sen aval, vostede o sabe porque forma parte dunha institución, as cousas teñen que estar avaladas.

Intervén a concelleira dona **Olalla Alvite del Río** para formular os seguintes rogos:

Sétimo rogo.- Recurrindo á hemeroteca, porque o papel o aguanta todo, como dicían vostedes cando se sentaban aquí enfrente, recollo textualmente unhas declaracións do daquela voceiro do grupo municipal popular e hoxe alcalde de Ames, que acusaban ao alcalde naquel momento de *vivir no país das marabillas por aprobar unha conta que inclúe maior gasto, maior débeda e maiores impostos en crise*. Eran unhas declaracións súas en relación á aprobación do orzamento do ano 2010. Se aquel alcalde vivía no país das marabillas eu non sei en que país vive este goberno. Estamos en xuño de 2012 e este goberno continúa a tirar para adiante con esas mesmas contas, con ese mesmo orzamento, un orzamento que vostedes criticaron, que vostedes rexeitaron porque non era o seu, e un orzamento que ademais, como vostede dicía, non se correspondía cos tempos de crise que se vivían. Daquela era 2010, estamos en 2012 e eu creo que desafortunadamente a crise, lonxe de ir a menos, foi a mais.

Toma a palabra o señor alcalde don **Santiago V. Amor Barreiro** para preguntar: Señora Alvite, aquel orzamento foi aprobado polo PsdeG, que gobernaba ¿e por quen mais?

Continúa a señora **Alvite**: Polo BNG naquel momento, e rexeitado polo PP, que hoxe goberna con ese orzamento prorrogado. Leo textualmente unhas declaracións da acta do pleno de abril deste ano na que vostede dicía *Este goberno dixo que ía traer uns orzamentos para este ano que presentaremos o vindeiro mes de maio, e non é intención nosa presentar orzamentos só nos anos pares como viña ocorrendo ate o de agora neste concello. A nosa intención é poder facer un orzamento real ano a ano*. Estamos a finais de xuño de 2012, o meu rogo é que deixen de mentir, que digan a verdade e que afronten as cousas e non tiren para adiante a cegas.

Toma a palabra o señor alcalde don **Santiago V. Amor Barreiro** para dicir: Vostede

sabe que houbo reaxustes que houbo que incluír no orzamento, houbo novas subvencións que se teñen que incorporar. Imos presentar un orzamento, vostede se quere o apoia ou non; confirmou que no seu momento apoiou o orzamento do PsdeG, un orzamento que era irreal, nós presentaremos un orzamento e xa é liberdade súa apoialo ou non.

Intervén o concelleiro do grupo municipal socialista don **José Francisco Doval Galán** para formular os seguintes rogos:

Oitavo rogo.- Dirixido ao concelleiro de Vías e Obras. Estiven o outro día en Pedras, na pista que está mais preto de Castrelo, que leva á carretera xeral Roxos-Portomouro, brota auga. Non queda moi claro se é auga que procede da traída ou dunha mina, o caso é que está afundindo a carretera. Non sei se desa mesma auga ou desa posible mina volve brotar mais abaixo, aínda que non é tan escandaloso, porque na parte de arriba é un manantial moi claro; abaixo xa é case a carón do regato onde afondouse a estrada e hai un bache bastante fondo, que creo que tamén debe de provir da auga que se está filtrando. O meu rogo é que o miren canto antes, que non se lle estea dando voltas a se é cousa de Espina & Delfín ou non, que se poñan os medios para saber en primeiro lugar de onde procede a auga, que eu penso que é da mina e que non é filtración. Haberá que comprobalo e asegurarse que non é da traída, e poñer os medios para que a estrada nesa zona non siga a se afundir.

Noveno rogo.- En referencia á limpeza, se contratou tarde o servizo dos tractores. Rogo que acelere un pouco, por exemplo, na antiga estrada de Portanxil, en Trasmonte, que está bastante tapoada pola vexetación, e non sei exactamente quen foi pero me comentaron que esa estrada non se limpaba porque era da Deputación, pero nós sempre a limpamos e sempre se mantivo en bo estado, porque non vai vir aquí a Deputación a limpar precisamente esa estrada.

Preguntas.

Intervén o concelleiro don **Anxo Doval Rey** para formular a seguinte pregunta:

Primeira pregunta.- Dende principio da lexislatura o goberno tomou a decisión de, nos casos dos obradoiros culturais e as escolas deportivas, dar nominalmente a determinadas asociacións a súa xestión. Isto viña acontecendo ate o de agora. A pregunta é se iso xa cambiou, porque curiosamente no obradoiro de xadrez hai unha entidade no noso concello que está acadando bastante importancia, con xente moi preparada, que plantexou levar ese obradoiro e se lle dixo que non ¿se cambiou ese criterio que se nos dixo que era un criterio do goberno de, en vez de darlle a unha empresa privada a xestión das escolas deportivas e obradoiros culturais, darlla ás entidades do concello? Porque esta é unha entidade de xadrez boísima, con xente moi preparada, á que se di que non, e o mais grave é que se lle di que nin sequera vai ter o mais mínimo espazo para desenvolverse.

Intervén a concelleira delegada de Medioambiente, Sanidade e Cultura dona **M^a Eugenia Martín Vicente** para dicir: Eso no es cierto.

Continúa o señor **Doval Rey**: Pois iso é o que me transmitiron a min, pero mais que isto me importa o tema de se o goberno cambiou o criterio e se a partires de agora, existan ou non entidades no concello que poidan impartir un obradoiro ou unha escola, se lle vai dar a xestión á empresa privada.

Continúa a señora **Martín Vicente**: En ese asunto no hay un criterio cerrado, es algo que se está estudiando. En cuanto al local no se le ha dicho que no vayan a tener espacio, sino que ellos pedían un espacio que ya tiene asignada otra función, y se les dijo que ese espacio que ellos pedían no podía ser, en ningún momento les he dicho yo que no fueran a tener espacio por parte del concello, jamás, pero aquel que ellos pedían tiene otra función y otra finalidade.

Continúa o señor **Doval Rey**: Pero, ate o de agora dende logo, había un criterio ¿se están replantexando o criterio?

Continúa a señora **Martín Vicente**: No, no estamos replanteando el criterio. Este año esa clase de ajedrez se mantiene como estaba, no quiere decir que el año que viene no se cambie.

Toma a palabra o señor alcalde don **Santiago V. Amor Barreiro** para dicir: Señor Doval, eu podo informarlle o que me transmitiu a min o presidente do clube, que era presidente doutro clube, que cambiaron a presidencia hai un mes e medio e pediron un local, pero xa estaban utilizando outro local na Casa da Cultura do Milladoiro

Continúa a señora **Martín Vicente**: A mi me pidieron un local, uno, y de ese se les dijo que tenía otra función. A mi no me han pedido más que eso.

Intervén a concelleira dona **Pilar Candocia Pita** para formular as seguintes preguntas:

Segunda pregunta.- En relación aos comedores escolares, dirixida ao señor García Argibay. Respecto da cantidade que vai aportar a Xunta de Galicia ¿como se chega a esa cantidade, hai unha cantidade por usuario? o pregunto porque a min me chama a atención que os últimos datos que tiñamos, porque os deste ano aínda non están completos, evidentemente, eran que ao concello de Ferrol para 425 comensais lle deran 65.000 euros, iso estaba na páxina Web oficial da Xunta de Galicia, e agora a nós nos dan 60.000 para os alumnos que tiñamos en 2011, que supoño que foi co que traballastes porque os deste curso aínda non estaban matriculados, para 1.086 alumnos. A min me parecería razoable que houbese por parte da Xunta de Galicia subvención por alumno, non que haxa esa diferenza tan grande, isto nos pon na metade do que lle deron ao concello de Ferrol. Non sei se é que este ano tamén lle baixan a ese concello, porque as cantidades deste ano non as teño aínda, pero me gustaría saber se hai unha cantidade estipulada por alumno e como foi a negociación. En todo caso é moito menos do que contabamos.

Terceira pregunta.- Respecto da matrícula dos comedores pedimos uns datos por escrito que supoño que está procesando o departamento, porque imaxino que aínda non están, a pregunta é ¿xa teñen os datos respecto a se hai baixada de matrícula con respecto ao curso que ven de rematar?

Cuarta pregunta.- Na cantina que está na piscina de Bertamiráns, que ate o de agora a levaban as persoas que estaban no polideportivo ¿hai un cambio de xestión? Nós preguntamos pola mañá ao interventor e nos dixo que había intención de poñer máquinas, por aí se está dicindo outra cousa, e nos gustaría saber se vai saír un concurso, se hai unhas bases claras de quen pode presentarse, non tanto por un empresario, senón ao mellor para os clubs, en que condicións se fai, ou se é o concello quen o vai xestionar por medio de máquinas.

Intervén o concelleiro delegado de Deportes, Tempo Libre e Voluntariado don **Manuel Ferreiro Santiago** para contestar: Está o trámite sen finalizar, non queren seguir coa cantina os que a levan, estamos pensando, a min só me veu unha persoa a preguntar se o podía levar. Non hai nada definitivo.

Continúa a señora **Candocia**: ¿Pero se fixo público? porque para que veña a xente a preguntar ten que saber ¿vai haber procedemento, para que se saiba un mínimo?

Continúa o señor **Ferreiro**: Moito tempo non vai dar.

Continúa a señora **Candocia**: Se se lles ofrece aos clubs, por exemplo, como se fai no caso de Tapia, e se lle ofrece a todos os clubs do entorno, que sexa unha cousa con todas as da lei, cunhas condicións claras para todos e quen a colla que o faga cunhas normas, que non se dea a dedo.

Toma a palabra o señor alcalde don **Santiago V. Amor Barreiro** para dicir: Todo prego e procedemento que se seguiu forma parte dunha Xunta de Goberno, agora está pendente a resolución do expediente.

Continúa a señora **Candocia**: Eso para o pavillón, pero para a cantina de fóra as persoas que xestionaban comunicaron que non o queren levar, entón se se ofrece, como no caso da de Tapia, aos clubs deportivos da zona, que se faga cuns criterios para que todo o mundo se entere, que haxa unha especie de prego.

Intervén o señor interventor municipal don **José Antonio Rueda de Valenzuela** para dicir: É un procedemento que tramitará o departamento de contratación e chegado o caso a intervención fiscalizará, pero obviamente para que alguén poda estar explotando unha cantina por pequena que sexa se teñen que respectar os principios de publicidade e concorrência.

Intervén o concelleiro delegado de Persoal, Reforma Administrativa, Servizos e Urbanismo don **Ramón García Argibay** para dicir: En canto ás súas preguntas, á primeira a contestarei por escrito, e da segunda aínda non temos os datos definitivos.

Intervén a concelleira dona **Olalla Alvite del Río** para formular as seguintes preguntas:

Quinta pregunta.- Un veciño nos comentou que o transporte metropolitano sufriu problemas este domingo, algúns autobuses da liña que une Bertamiráns con Santiago de Compostela non funcionaron, concretamente o das sete e cuarto, oito menos cuarto e oito e cuarto ¿están ao tanto diso e saben a que se debe? se é así ¿xestionaron algo ou significa que entra en vigor un novo horario? Con respecto a isto, que se actualicen os horarios que están instalados nas marquesiñas porque están obsoletos.

Sexta pregunta.- Unha pregunta para o concelleiro Emilio Martínez Carballeira, que aínda que non entra dentro das súas competencias, sei que está moi preocupado polo tema ¿hai moito que non das un paseo polo pobo e ves a situación na que está o paseo fluvial en canto a mantemento, e tamén os xardíns da rúa Anxeriz e os que hai enfrente ao novo aparcadoiro que se fixo na rúa Castelao, etc? Non sei se é que agora que estás no goberno non paseas e non ves as situacións. Se é así retoma os teus costumes, e coméntao co compañeiro.

Intervén o concelleiro don **Emilio Martínez Carballeira** para dicir: Estimada Olalla, fun moi crítico co equipo de goberno cando estabamos na oposición, e pódoches dicir que quizais sexa mais crítico agora cos meus propios compañeiros, e sobre ese aspecto creo que o sabe o concelleiro.

Toma a palabra o señor alcalde don **Santiago V. Amor Barreiro** para dicir: Sobre a frecuencia do autobús pódolle dicir que esta semana dende a Dirección Xeral de Mobilidade nos remitiron as planillas dos horarios e nos preguntaron se tiñamos algo que obxectar, e lle informo que este concello vai obxectar eses horarios no tocante sobre todo á liña do Milladoiro, que xa é unha vella reivindicación dos veciños que van

a Santiago de Compostela. Os sábados, entre as dúas e as catro da tarde non teñen ningún tipo de servizo, imos alegar contra iso e mesmo contra outro horario que se da durante a semana. E contra algunha frecuencia de Bertamiráns tamén imos alegar. Despois está en mans das concesionarias ofrecer mais servizos. Se quere lle remito a vostedes e ao señor Miñones os horarios que nos pasaron, por se queren facer algunha aclaración, porque entre todos ao mellor podemos ver mais horarios porque hai moita frecuencia. Recordo que o ano pasado se suprimiron liñas. Co horario de verán se suprimen frecuencias, a empresa concesionaria llo comunica á Dirección Xeral de Mobilidade e ás veces o comunican aos concellos e outras non. Houbo críticas por parte do alcalde de Brión, e as manifestacións que fixen eu están na prensa respecto a que se nos debería comunicar, polo menos para que a cidadanía tivera información dos cambios dos horarios.

Intervén a concelleira dona **Susana Mallo Redondo** para formular as seguintes preguntas:

Sétima pregunta.- ¿Cal é o uso destinado ao antigo cuartel da Garda Civil, agora pechado, e que non ten uso dende hai bastante tempo?

Oitava pregunta.- ¿Como se van xestionar este ano as bibliopiscinas? ¿con que persoal, con que programación?

Novena pregunta.- En relación aos campamentos ¿que cantidade do que custa cada un cubre o concello?

Décima pregunta.- ¿Como paga o concello os campamentos? ¿por neno que finalmente vai matriculado ou ten que pagar uns fixos por grupo de nenos ou campamentos previstos?

Intervén a concelleira delegada de Medioambiente, Sanidade e Cultura dona **Mª Eugenia Martín Vicente** para dicir: Por neno, xa estaba previsto así.

Undécima pregunta.- Relativa á área de Deportes, unha pregunta que xa quixen realizarlle en maio, daquela para saber se o concelleiro tiña coñecemento, e quero pensar que agora si o ten, pero o coñecemento tamén indica a aceptación ¿é vostede coñecedor de que a empresa que imparte as clases de patinaxe durante o curso ofreceu clases de continuación no mes de xuño e no mes de setembro? É dicir, nós temos unha actividade que é patinaxe, que se ofrece de outubro a maio e se asigna a unha empresa coa que se concerta o prezo, e esta empresa ofreceu “clases de continuación”, que así lle chaman, no mes de xuño e setembro por 20 euros ao mes. Están facendo uso da oferta pública, da oferta municipal, para unha actividade privada con fin de lucro, e ademais, como o ofrecen como continuidade, o fan en instalacións municipais.

Intervén o concelleiro delegado de Deportes, Tempo Libre e Voluntariado don **Manuel Ferreiro Santiago** para contestar: Están vacías e pedíronas os pais.

Continúa a señora **Mallo**: Non, os pais non as pediron, os monitores reuniron aos pais e lles ofreceron as clases, é bastante diferente. En todo caso os pais poden pedir moitas cousas, pero estamos falando dunha empresa privada con ánimo de lucro que utiliza unha instalación municipal. Usa como gancho o curso para sacar beneficios en xuño e setembro, a 20 euros rapaz e mes, que en comparación co que se paga o resto do curso, hai que ter as barbas moi ben postas.

Décimo segunda pregunta.- Esta última pregunta non podo evitar facela cunha reflexión anterior, porque se se busca nas actas destes plenos polo meu nome aparecerá sempre ligado preguntar cando saen as axudas para material escolar e libros para as familias. Xa sei que saíron. Esa pregunta a levo facendo, e non quero enganarme, dende o mes de xuño ou mais tardar xullo do ano pasado. Naquel momento, ao que eu invocaba era a esa misión responsable da que fala o señor

Argibay, ao difícil mes de setembro que ían ter as familias, para que se axilizase e por unha vez se convocasen as axudas antes de setembro, para que cando tivesen que facer o desembolso dos obradoiros culturais, das escolas deportivas, dos libros de texto, da roupa para a escola e tantísimas cousas que chegan en setembro, cando menos esas axudas se sacasen con responsabilidade, e acaban de sacalas agora. A iso xa non hai comentario. Agora, que nos están dando as listas dos libros do ano que ven, agora podemos pedir axudas para pagar o material que houbo que pagar en setembro, porque sempre é do que se trata, de que pague o veciño e xa veremos se llo devolvemos. Se hai cotas de lixo posteriores lle rebaixamos un pouquiño, si, despois, despois xa o veremos. En setembro houbo que poñer os cartos. A pregunta é se saíndo as axudas a esta altura, que é vergonzoso, aínda por riba ¿por que saen só para infantil? ¿é que o resto das familias non teñen necesidades?

Intervén o concelleiro delegado de Persoal, Reforma Administrativa, Servizos e Urbanismo don **Ramón García Argibay** para dicir: En canto ao antigo cuartel da Garda Civil se vai destinar a servizos do concello en vías de que o Milladoiro teña un lugar adecuado para atender aos servizos sociais, que están agora nunha situación moi apretada e cremos que o mellor lugar para ofrecer certos servizos que se están dando nas oficinas de servizos xerais pasen para o cuartel da Garda Civil, sobre todo os relativos ás empresas concesionarias. Creo que é un paso importante, primeiro de cara a que os servizos sociais estean centralizados, e en segundo lugar porque coas concesionarias externas do concello no seu momento se pactou que tiveran un local en dependencias municipais. Ese é o destino que vai ter o cuartel da Garda Civil, despois de que se desbotara por outras cuestións. É unha solución que vai mellorar sobre todo o funcionamento dos servizos sociais do Milladoiro, que moita falla fai.

Intervén o concelleiro delegado de Comercio, Promoción Económica, Traballo, Turismo e Educación don **Bernardo Moar Míguez** para dicir: As bibliopiscinas as van levar animadores socioculturais, persoal da biblioteca e persoal do concello.

En canto ás axudas, non van só para material escolar senón tamén para libros de texto, que cremos que é onde debemos de facer o esforzo, no segundo ciclo de educación infantil. Nun máximo de dous meses vai saír a próxima convocatoria. As que saíron son as do curso 2011-2012. Non saíron para primaria e secundaria porque entendemos que as subvenciona a Consellería de Cultura, Educación e Ordenación Universitaria e non ten que subvencionalo o concello.

Intervén a concelleira do grupo municipal socialista dona **Patricia Conde Lois** para formular as seguintes preguntas:

Décimo terceira pregunta.- En relación ao proxecto da Travesía do Porto anunciaron que se renunciara ao presupostado no orzamento e había tamén, por outra banda, a parte da financiación prevista no orzamento, 400.000 euros a través dun convenio coa Deputación. A pregunta é ¿que pasa con eses 400.000 euros? ¿se van utilizar para algunha outra inversión ou pérdeos o concello ao renunciar a ese convenio?

Décimo cuarta pregunta.- Enlazando co que dicía a compañeira Olalla ¿para cando o orzamento? Porque xa se nos veu dando largas durante todo o ano, se é que vai haber orzamento este ano, porque se esperan a facer reaxustes como dixo anteriormente, así vai ter un orzamento real total.

Décimo quinta pregunta.- Dirixida ao concelleiro de Educación, referente á Escola de Verán, que segundo o anunciado na publicidade empeza o luns día 2 de xullo, e os

concelleiros socialistas non sabemos a fórmula de xestión ¿vai ser con persoal municipal, a través dunha empresa externa?

Intervén o concelleiro delegado de Vías, Obras, Parques, Xardíns e Patrimonio don **Alfredo Taboada Alvelo** para dicir: A Travesía do Porto ímola asfaltar prontiño, os cartos distribuíronse en varias partidas, a Travesía do Porto vaise aglomerar aí xa van 80.000 euros ou así, e vai levar tres pasos e dous semáforos, un na Casa da Cultura e outro xunto ao colexio.

Toma a palabra o señor alcalde don **Santiago V. Amor Barreiro** para dicir: Permítame que matice, o dos semáforos é unha intención, se nos dan os cartos. Como ten unha connotación urbanística, se quere intervir o concelleiro de Urbanismo, ten a palabra.

Intervén o concelleiro delegado de Persoal, Reforma Administrativa, Servizos e Urbanismo don **Ramón García Argibay** para dicir: A Travesía do Porto se vai rematar en breve. Se vostedes se fixan, ao carón do Centro Comercial xa están rematadas as beirarrúas, e estamos falando coas promotoras ás que no seu momento correspondían os gastos de urbanización. A nosa idea é executar toda a Travesía do Porto e que todos os promotores aporten o que teñan que aportar, e se non todo o máximo posible, que desenvolvan eles a súa zona. Temos o compromiso dalgún promotor de facer as beirarrúas, por tanto o apartado ese está ben encauzado e en breve van comezar as obras da mazá seguinte do Centro Comercial se nos poñemos en dirección cara a Ventín.

En relación aos cartos da Deputación, en canto estea perfilada a urbanización e que promotores están en posibilidade de acometer esas obras, que agora mesmo hai dous, todo vai ir en función da calidade que lle imos dar, sobre todo ao firme, ao asfalto, porque a seguridade vial é unha cousa que nos preocupa, se vostedes se fixan no proxecto alí se fai un estreitamento de dous carrís e de repente abre en tres ao lado do colexio de infantil, é un perigo, porque veñen os coches en tres carrís e de repente se meten nun solo, temos que solventar iso sobre todo de cara a que esa zona se vai dinamizar coa apertura do Centro Comercial e cos rapaces no desenvolvemento do curso. Insisto, a Travesía do Porto vai quedar decente, non vai ser o que a nós nos gustaría, por motivos presupostarios, pero a nosa intención é que quede segura, e para os peatóns que queren as beirarrúas amplas polo menos ter unha zona onda podan estar.

En canto á Escola de Verán, o vai facer unha empresa externa, como viña sendo habitual nestes últimos anos, polo tanto o luns comezará a empresa a desenvolver o seu traballo.

Intervén o concelleiro do grupo municipal socialista don **José Manuel Miñones Conde** para formular as seguintes preguntas:

Décimo sexta pregunta.- No decreto 688, creo recordar que do mes de marzo, se falaba da instalación do césped da pista de pádel por un importe de 4.720,00 €. Agora aparecen no decreto 1175 as obras por subministro e instalación deste césped por 5.569,60 €, e tamén de instalación de xogos deportivos por importe de 4.832,76 €. Non sei se con este decreto queda xa anulado o anterior, porque estaba con cargo á subvención que se facía ao Bertamiráns C.F. ou non se modificou ese decreto e aparece dentro desa subvención. Agora estiven facendo os cálculos e a cantidade total destas dúas ven ser a xustificación desa subvención ¿se modificou ese decreto ou non? ¿queda modificado con isto ou se tan que facer algún outro tipo de modificación?

Intervén o señor interventor municipal don **José Antonio Rueda de Valenzuela** para dicir: Non o sei de memoria, pero un decreto debe de ser unha xeración de crédito que se fixo con cargo á subvención que se concedeu. Na motivación desa xeración

hai un erro, porque realmente se están aprobando gastos que son conxuntamente, creo que as porterías para a pista de Aldea Nova, nos antecedentes do expediente se ven os presupostos adxuntos. O segundo dos decretos debe de ser a aprobación das facturas necesarias. Todo obedece a un erro de redacción e na xeración de crédito. Realmente o césped era para Aldea Nova.

Continúa o señor **Miñones**: ¿Entón non fai falla modificar a cantidade? porque pon que o césped son 4.720,00 €, e o IVE se mete dentro desta subvención, entón se despois se fai o gasto para a pista de pádel se pode xustificar?

Continúa o señor **interventor**: Non recordo exactamente como está ese asunto.

Continúa o señor **Miñones**: Pois entón revise iso, mais que nada de cara á xustificación que terá que facer o club.

E non habendo mais asuntos de que tratar o señor alcalde presidente dou por rematado o acto e levantou a sesión ás vinte e dúas horas e quince minutos do día 28 de xuño de 2012, de todo o que eu como secretaria certifico.

Vº Prace

A secretaria

O alcalde